

梅莊詩鈔

梅莊詩鈔卷六

庚子辛丑

三庚集

天津

華長卿

枚宗

題結網圖爲漁莊弟

長庚作

楊柳依依綠到門。桃花漲煖上河豚。隔溪網曬斜陽裏。
髣髴江南第幾村。且聽滄浪醉後歌。得魚何必計多多。龍門躍出琴高鯉。
不受人間舊網羅。

宮保少司空汪筠溪先生侍妾楊蔡二姬同時殉

節詩

庚子元夕事

火樹銀花照金谷。罡風吹折雕梁木。大星墮地小星哀。

月華慘澹姮娥哭。嬾昏嫠黯寒無光。紅閨夢魘雙鴛鴦。
鬼磷夜閃素幃冷。蝸蟻對繫朱繩長。英皇聞之輟然笑。
杜鵑啼血黃陵廟。翠竹搖風淚點斑。淩虛環佩來同調。
差池燕燕飄芳魂。美人攜手哭聲吞。願作芻靈殉同穴。
一死非報司空恩。投繯烈魄登天府。綠珠歌罷紅綃舞。
桃根桃葉綰連枝。枯盡花容香萬古。

花朝後二日袖石來津促余北上詩以贈之

名士困畎畝。朝端多豎儒。衡文誇藻鑑。目瞠四子書。豈
無巨眼人。光怪搜遺珠。愛才不愛盡。抱璞泣半途。滄海
千金椎。胡爲中副車。差喜元方兄。捷足得前驅。覆試靈

光殿妙筆冠鴻都詩人暫駐足攆船來津沽到門問詞
客入市邀酒徒知音世有幾嗜好若合符賤子甘埋頭
長年守蓬廬榮名何所貴才高德不孤蒹葭倚玉樹小
巫見大巫慙媿騷壇中一時推亮瑜雖未絕塵奔尙能
跬步趨旗亭一杯酒良言冑贈吾前程須努力當代有
歐蘇莫學厭厭人李志與曹蜍

登車口號

又踏長安道東風撲面涼離情甦弱草春色殢垂楊隄
東長河窄沙蕕曠野荒何人開水利辛苦問耕桑時春
帆方

伯抵津勘
營田事

蔡村早發

月墮明星炯。風尖吹未休。斷碑蹲似虎。叢樹吼如牛。遠
火來新鬼。殘更到戍樓。巾車有詞客。獨自擁征裘。

謁文丞相祠

柴市風沙捲地黃。狀元枯骨至今香。河山半壁支閩粵。
海嶠中流哭陸張。大漠幾人歌正氣。小樓終古賸殘陽。
東南望斷冬青樹。魂魄惟知拜宋皇。
刀頭一笑血淋漓。人死留名豹有皮。漫道書生難破賊。
斷無豪傑不能詩。零丁洋畔風霜苦。惶恐灘邊雪浪吹。
廿一史從何處讀。此心祇有壘山知。

都門詠懷古蹟

薊門煙樹鬱蒼蒼。春色晴烘萬柳堂。若問名花誰第一。
豐臺芍藥壓姚黃。

燕市悲歌意氣豪。再來難覓舊荆高。一腔熱血酬知己。
鐙下摩挲看寶刀。

駿馬羣空抱此心。高臺何處鑄黃金。瘦餘猶是驂騑骨。
寄語孫陽莫浪尋。

招涼豈有夜光珠。都向城南問狗屠。莫道儒生無妙策。
滿天風雨讀陰符。

延壽寺

宋徽宗被虜居此

烽火倉皇出六宮
道君行色太匆匆
回頭艮嶽成荒窖
翻羨燕京景不同

王氣東南尚未休
渡江呼馬莫呼牛
劇憐一片西湖水
付與佳兒汗漫游

碧瓦朱楹夕照黃
汴京天子鬢如霜
河山拋卻無須戀
想到師師最斷腸

五國城邊夜月明
青衣行酒太多情
到來深感金人德
不遣官家執戟行

衣生蟣蝨劇堪憎
夜夜傷心伴佛鐙
幸有闍黎耽翰墨
和南索畫九秋鷹

紅牆一帶臥明駝。世界琉璃蒼翠多。車馬紛紛城北路。
無人重問宋宣和。

楊花四首用漁洋秋柳韻和陳慕青夫人作

兩度春光總斷魂。東風搖曳滿都門。攪成晴雪空留影。
捲入殘陽不見痕。芳草碧黏橋畔路。澹雲白糝水邊村。
顛狂情緒誰相妒。漫與羣花一樣論。

叛兒歌罷幾經霜。今日相逢太液塘。眉黛輕盈羞作畫。
腰肢瘦損怯開箱。眉垂青眼觀桃李。欲染烏衣問謝王。
墮落泥塗悲鍛羽。那堪重過鬪雞坊。

揉雲搓雪點征衣。驚覺三眠夢已非。風雨旗亭行客少。

鶯花門巷舊交稀半隨流水漂搖去又逐殘紅歷亂飛
轉盼陌頭春似海再來休與故人違

顧影依依祇自憐官牆咫尺隔鑪煙子規聲裏初飛絮
紅粉樓頭漸脫綿茵溷何須傷往事萍蹤曾否憶當年
東皇雨露勤培養莫遣飄零大道邊

六月初一日作

罡風摧大廈震瓦哭聲哀骨肉誰知己家庭頗愛才竹
林增涕淚花萼會泉臺駿足鹽車負慙子薄笨材

苦霖行

怪電跋扈瘦蛟舞龍蛇吸盡黃金浦雷電轟轟轉火輪

銀潢倒瀉甘霖苦春間田麥旱成災旱魃嬉笑農人哀
仰天看日悲祈雨縣官祈雨狂風來桑林不禱雨聲起
一旬兩旬雨不已似傾東海助波瀾雨中夜哭多新鬼
屋瓦亂震排壞牆人聲鼎沸雨更狂東山崩裂西山倒
壓死老穉尸骸僵萬間廣廈成坑坎產鼃沈竈城門掩
可歎愚氓死不知齋身粉首遭奇慘吁嗟乎旣死冤魄
何處鳴未死餓囚神魂驚衝風冒雨荷戈去努力海邊
方用兵

雨夜

風雨從天降銀河水倒流平吞牛女恨銷破鬼神愁兵

氣空中溼烽煙海外收聲聲山谷應疑瀉老龍湫

齋中讀書有感而作

賸得三椽舊草廬無多產業數編書腹藏奇字飢難煮
心醉殘經嬾不鋤身賤屢增兒女累家貧更覺友朋疏
茫茫前路愁何益杯水難甦涸轍魚

秋夜感懷

消盡相如渴家徒四壁空孤鐙吟夜雨老屋識秋風鏡
裏頭將白刀邊血不紅耽詩窮徹骨依舊未能工

談兵

四海承平久忽聞刁斗聲亂鴉驚過客疲馬戀孤城巧

擅封侯骨愁生大將營罪言多妙策掩耳怕談兵

中秋對月用東坡定惠院寓居月夜偶出韻

海邊明月東南來好景一年數今夜琉璃世界天公鑄
素魄清光澈上下斗牛瑟縮眾星死銀漢已涸波難瀉
良宵寂寂月照人蟾蜍不讓駿烏亞願影有誰知自愛
過去光陰那容借塵世繁華轉眼空月中丹桂無時謝
安得置身廣寒府九州一覽如同舍無奈前路黑似漆
佳境未到苦食蔗搔首問天天何言舉杯邀月醉不怕
但願對之無媿色笑譚一任庸夫罵

雜詩

南面攤書擁百城先生祇以酒爲名滿腔憂憤何來喜
慕見蠨蛸墜短檠

亭外荒池賸敗荷晚花開到翦秋羅翩翾冷蝶零星粉
猶逐殘香上下過

雕龍刻鵠幾時休漫道中書尙黑頭贏得虛名生兩角
吐涎作篆似蝸牛

紅蓼花閒列繡屏綠蜻蜓間紫蜻蜓夕陽欲墮風初起
腐草堆中露一螢

怪石峻嶒潤蘚皮清泉灑灑瀉深池壤牆褪粉描成畫
時見輒紋走蛤蜊

黠鼠無端解食鹽。養成羽翼福新添。黃昏月黑飛蝙蝠。
暗逐星光出短檐。

茶餘無事繞空廊。差勝曹騰臥竹牀。滿院濃陰人迹少。
綠莎階畔墜蜂房。

暮雨初晴漲小谿。殘霞倒影作虹霓。蚰蜒滿壁書蝌斗。
膈膊聲聲豢竹雞。

老蠶蛻繭出飛蛾。甕水緣邊坐碧螺。別有阜螽聲聒耳。
竹籠露冷叫哥哥。

衰柳陰中噪晚蟬。殺心忽伏七條絃。螳螂縱有藏身巧。
挾彈難防暗裏弦。

誚爾荒經腹笥虛疑塵滿席半牀書翰通脈望皆仙去
剩有蠃蟹學蠹魚

鼓吹門庭兩部蛙池泥沒肝躍蝦蟆雨酣歷亂喧通夕
酷似羣僧誦法華

漫言綠蟻勸提壺捷徑能穿九曲珠蚯蚓負緣誇得計
一生辛苦在泥塗

槿花籬畔豆花濃蟋蟀聲中綠草茸不是半間堂上客
亦來踞地鬪秋蛩

堪恨青蠅早市催白蚊日暮闌成雷天生一樣貪饒性
只爲趨炎附熱來

松柏無心冒兔絲寄生小草徧荒祠花間果羸螟蛉負
抵死猶爲異姓兒

蟲傷禾稼苦農人結隊喧呼罵蜡神冑把青蚨買蝗子
早秋天氣飼鷓鴣

蜜官爭採百花香醞釀甘飴味似糖堪笑轉丸矜智巧
半生逐臭是蜣螂

儘有絲綸貯腹中蜘蛛空負織機工可憐密結羅羅網
祇得人間蚱蜢蟲

磨蠍身宮志尙豪雕蟲小技歎徒勞一編爾雅君休誤
漫把蜉蝣當蜉蝣

次韻葵生卽事書懷

傀儡登場莫改圖紅綾餅餤列仙廚因人成事眞名士
與我無緣是腐儒愛客不忘投筆吏結交曾識守錢奴
陶朱猗頓今何在漫笑書生伎倆無

十年辛苦赴長安銷受東風撲面寒識曲屢遭公瑾顧
知音羞對伯牙彈悔無殊藝傳三絕薄有虛名說二難
日下鶯花春似海再來休作布衣看

南風行

南風吹海平如砥蠻煙未斷烽煙起百丈朦朧破浪來
電光石火奔雷駛大嶼山邊戰鼓搥跳梁封豕走長蛇

汚人銅臭腥羶飽列陣紛紛噪晚鴉當年瓊島疏防檢
貳師鬻地亡天險尺土能收百萬金引狼入室門難掩
澳門鼎沸廈門孤節鉞張皇一策無巾幗叢中慚鄧曼
梅花香裏夢林逋煙焰薰天賊計謫粵東轉戰趨閩浙
颶風猛烈巨濤狂可憐定海盈城血寡謀張郃想奇功
撤守雄師伏莽叢馬上那知談將略書生籌畫薄姚崇
武夫復諫城難保忠魂神往田橫島猿鶴蟲沙頃刻奔
如逢倭寇驚騷擾烏衣公子欲揚威三匝盤旋鵲不飛
往日太平工粉飾臨時籌策冷書幃蠻軍猖獗飄洋走
登萊鎮帥能堅守揚帆萬里逐秋濤乘風直到津沽口

森森芒角動機槍旁午軍書鐵騎忙三百乞兒充一隊
揭竿擁盾雜戎行將軍戰陣初經略恐懼臨深如履薄
祇飲瓊筵一勺羹預儲敗鐵千家鏹紅衣火礮守墩臺
怕聽聲聲畫角哀變理陰陽真宰相解圍全仗雨師來
決計沈舟需破釜三旬注潦商羊舞避暑深藏高士家
荷戈誰識愚民苦泥塗跋涉夜深行不戰何須屢調兵
雷電轟殘韓信壘甲兵洗淨亞夫營幸有奇謀出微弁
海濱亦學鴻門宴對席何勞犬豕爭犒軍不憚牛羊獻
開門揖盜禮樵僂兩紙蠻書萬手鈔刁斗聲從雲外息
兵戈氣向雨中銷卸肩粵海非心服巨鼇漏網將軍福

旣船柁轉指南車夜叉憤怒鮫人哭昨朝海畔熾妖氛
九里孤城守護勤拔纛不遵間外令登陣都是火頭軍
折臂營兵脫征調道旁側目掀髯笑舊衾敝袴與殘軀
于今都作軍需料臨陣從來貴用柔攻心何必費奇謀
虎鬚燕頤封侯骨且向炎方擁八騶戰船乍退三軍慶
出沒不測猶難定一夕謠傳復戒嚴倉皇老卒思逃命
盧循膽裂怒濤寒鄭錦魂亡巨浪乾鑿齒雕題真小醜
肯勞卿相屢登壇彈丸失守無人惜浙門未見馳飛檄
毒霧眼看滅蚩尤瘴煙仁盼殲長狄誰是淮陰大將才
海邊莫遣戰場開南風不競北風勁吹阻樓船永不來

除夕作

脫卻青衿已十年冬烘猶自擁寒壇
漫誇詩草真無敵獨與梅花最有緣
歲月漸催塵世改文章不讓古人傳
策名薄宦知何日一笑銜杯莫問天

正月初九日馬頭遇雪

辛丑

一白連天地銀光耀馬頭
隔河茅屋矮夾岸玉山稠
瓊徑埋深轍巾車擁敝裘
劇憐行路客疑泛剡溪舟

曉過吳家營

顛簸輪蹄鐵詩人凍不勝
病羸涎濺血疲馬汗成冰
野曠風如刃天寒月有棱
吳營何處是遙指半明燈

贈宋理門明經賢

春光又到豔陽時
良友相逢合詠詩
轉盼枝頭紅杏鬧
雲箋寫徧子京詞

熒熒鑪火映鐙光
紙帳梅花夢亦香
消受布衾寒似鐵
有人風雪話連牀

竹屋松窗月影清
快譚容易到三更
梅花又得新知已
鐵石心腸宋廣平

騷腸賦骨笑狂奴
握管欹斜意氣麤
蓮品蕩心誰寫得
斯人端合住菱湖

出都口號

帶甲滿滄海征車怕載兵十千求劣馬偷過亞夫營

送郭筠孫孝廉

師泰

之舞陽

紅杏飄零折柳枝送行風景斷腸時知君愛我情無盡

寫遍梅花一卷詩

十友詩編抄選拙詩獨多

羨君誤著等身多

著有滌襟樓四種古文所見錄等集

笑殺經生鐵硯磨

投筆祇謀升斗計一肩行李渡黃河

欲尋古蹟問荒邱屠狗英雄絳灌儔海角大風歌猛士

于今卻憶舞陽侯

舞陽有樊噲冢

看人先著祖生鞭廉吏兒孫不值錢萬斛離愁何處訴

相逢休待甲辰年

送徐楊芝仙明府文保之官蜀中

東海有佳士西川爲宦場
潼關秋色老劍閣暮雲涼
工部詩名大坡仙翰墨香
更期作循吏漢代有龔黃

未遂登瀛志都緣一字差

朝考已入上選因佳韻誤用差字被黜

醉辭燕

市月飽看錦城花芸牘朝聽訟蒲鞭午放衙
古來名將相先要到三巴

我亦風塵客輪君早出頭離情彈別淚舊雨動新愁
江漢眞羈旅乾坤有釣舟
檀花桃竹路何日快同游
恕我狂奴態相交已十年
論文曾對酒埽筆共攤牋
此別皆前夢重逢問後緣
囊中藏錦句莫貯宦途錢

秋興八首追和杜工部元韻

潮滿江湖煙滿林，琅邪柳色已森森。
西風橫掃千間廈，殘照空留半畝陰。
歲月蹉跎悲壯志，科名毳毼損雄心。
平生恥作牛衣泣，杵臼聲中賦藁砧。

霜緊天高雁陣斜，澄清攬轡看中華。
漫隨李白眠燕市，擬學張騫泛漢槎。
樓上何人吹短笛，海邊幾處動哀笳。
遙知南粵田千頃，罌粟猶開豔豔花。

在山小草慕春暉，腸斷彭咸叩紫微。
捧日有心朝北望，摩雲無翅向南飛。
趨炎豈肯因人熱，好古何妨與俗違。
詆蕩天門高萬里，那知民瘼宰官肥。

羊曇乞墅賭輸棋猿鶴吞聲草木悲漫道淮陰眞善將
可憐顏駟不逢時零丁戰士牙檣亂旁午軍書羽檄馳
試問秋風何處起萼羹鱸膾動鄉思

戴笠相逢飯顆山詩人終不老林間莊光未必甘垂釣
梅福何心隱抱關豔羨六曹書鳳諾妄希三載覲

龍顏竹林舊友須珍重好護他年玉筍班

干戈叢裏募蒼頭城郭誰知海外秋黃土搏成媧后恨
朱提買得杞人愁火光閃爍堂前燕雲影漂搖水上鷗
相業何如賈秋壑

天威不許到杭州

挾策書生詡立功一韓一范在軍中刀頭痛飲賢人酒
臺上狂歌猛士風野菊開殘朝露白亂鴉啼帶夕陽紅
無衣儘有同仇志莫賦新豐折臂翁

聞說梁園路邈邈桑田萬頃盡成陂生同狡兔營三窟
死共鷓鴣借一枝奇句敢邀東野和佳文休向北山移
海氛河患誰能靖長使鰥生淚暗垂

諸將

粉飾太平久朝端誰解兵將軍難靖逆巨寇任橫行黯
澹干戈氣悲涼鼙鼓聲海氛今復熾痛哭五羊城

不戰亡香港忠魂赴上游

關軍門
天培

虎門屍徧野鳳嶺血

成溝袖手皆良吏攻心乏遠謀軍中諸將相誰釋

九重憂

粵秀山前路淩虛若有神颶風銷海市靈雨靜邊塵金

鑄公侯膽瀾翻太守脣

廣州守余保純四次議和

論功膺上賞慚愧

義旗民

聞道廈門失風檣又北來寧波兵力弱定海戰場開四

鎮蟲沙集

葛雲飛王錫朋鄭國鴻皆戰歿獨余步雲一軍尙全

三軍猿鶴哀可憐

名將後

裕魯山制軍爲定西將軍班公孫

含笑入泉臺

老將猶耽色庸臣祇愛錢紅衣吹礮火碧海起烽煙募

選千鈞弩安排萬里船書生能破虜碣石卽燕然

哭升兒詩

辛丑十月四日四子升兒殤竹生子芸年十一
矣亦於是日同時殤越五日筠莊次子連寶又
殤余兄弟時運何相若耶作詩以哭之

窮愁世界哭佳兒和淚濡毫又詠詩低問山妻曾憶否

酉年人日降生時

兒生于戊戌正月
七日尚未立春也

昨宵猶聽笑言頻泡影空餘夢幻身底事天公情太忍
無端奪我石麒麟

嶄然頭角白眉良僕媼爭誇馬幼常生恐傳家書種絕
羣兒誰紹舊青箱

讓梨推棗儘多才頃刻曇花過去來竹馬紙冠諸戲具
可能攜取到泉臺

銚前顧影似童烏亦學諸兄夜讀書翰墨留香沾齒頰
拈毫伸紙亂鴉塗

玩器歸貽笑語歡牽衣亦欲到長安言猶在耳喃喃說
問我何時始得官

里謠酤酒喚哥哥靈氣銷亡一刹那心血數升嘔已盡
見以痘疹未
出嘔血死月留餘瀝贈詩魔

同抱西河痛最深

謂筠莊
竹生

阿芸阿寶共招尋風摧玉樹

亭亭折腸斷人間老竹林

辛丑冬日重讀滇游日記率題三律留別成言

萬里家山遠三年道路忙滇池晴漲煖沽水凍波涼舊

雨成今雨元方伴季方秋風知己少重作校書郎

甲午挑取

膳錄庚子復經挑選

飽啖風霜味青年屢壯游灘聲魚腹急月色洞庭秋花

鳥窺吟筆江湖送客舟春光長若此一曲錦纏頭

交誼澹能久詩懷窮轉深老添行腳債寒釀遠游心舊

學虛名誤新愁短髮侵秦淮花萬朵何日共追尋

梅莊詩鈔卷六

孫鐸孫校字

梅莊詩鈔卷七 辛丑

南行草

天津 華長卿 枚宗

辛丑十月將之金陵留別

滿天風雪擁征裘辛苦長途賦壯遊飽讀半生誰說項
飢驅千里且依劉停鞭欲訪烏衣巷著屐休登燕子樓
指日海濱烽火息詩人馬上幾回頭

宅相難成愧魏舒虛名空慕馬相如一心望切登科再
卅載恩深上學初

自七齡從學於舅氏

志士光陰分寸惜中年蘊

蓄斗升儲寒門支絀勞予季珍重家傳萬卷書

枯草粘天野色昏幾聲驪唱最銷魂封胡忍灑西河淚

梅莊詩鈔

卷七

東觀室

謂筠莊竹生兩弟

嵇呂爭開北海樽

徐楊墨樵沈述之解又銘王成言于景庵壘爲祖餞

別緒愁添沾上月鄉思夢繞水邊村六朝金粉青山在
一櫂扁舟向白門

冰霜如玉碾輪蹄縱到窮途路不迷當代交游風雨散
渡江人物斗山齊門前且漫題凡鳥酒後終須養木雞
此去茫茫窺宦海好留雪爪認鴻泥

二十八日與筠莊別於里門馬上作詩寄之

前程千里與萬里胡爲鬱鬱久居此飢來驅我作遠游
橐筆依人今日始北風吹雪舞空林長河堅冰凍徹底
窮冬忽爾唱騷歌祇爲陸莊荒盡矣去去爭驅黑白衛

病弱妻孥愁不喜
替替甘口累季方巧婦難作炊無米

況值雙雙兒女殤

時升兒小女阿端姪連寶姪女阿富相繼殤

四人幸免饑

寒死劇憐死別復生離
天公磨厲奇男子此行非爲鑄
黃金但願青眼逢知己
陸雲大笑唐衢哭餅罄恐貽
之恥轉瞬韶光過眼
新春草池塘吟夢裏
何時夜雨聽聯牀
天外雁聲鳴不已

汪莊展墓愴然有作

澹澹朝曦射墓門
如璫衰草拜兒孫
問尋大父循良績

先祖省香公曾筮仕江南

未報重慈教育恩
肯構敬遵前世訓
九

熊難侍再生魂
竹林更有憐余意
忍拭黃泉凍淚痕

車中口號

磨鐵輪蹄不暫停。亂冰殘雪古長亭。行人遠把鞭絲引。
煙霧溟濛楊柳青。

行餞朝來到野莊。問名何故號梁王。朱三不是眞天子。
果否屯兵聚此鄉。

宰相眞慙管樂儔。濁流不肯附清流。傷心若問崇禎事。
羞向門生說故侯。

官衙猶有破垣存。市井蕭條似小村。艷說太平眞景象。
荒城欲閉竟無門。

靜海道中

天形如覆釜。河勢似盤龍。岸有未銷雪。墳多不老松。碑
殘微辨字。寺廢尙留鐘。悵望鹽河道。誰尋馬鬣封。

過滄州抵泊鎮作

春洩河堤臥土牛。新城雉堞問滄州。殘陽欲墮風初起。
燈火黃昏到泊頭。

望中條山

中條山上多古樹。下有陽城讀書處。挂劍潛隱在此間。
實學肯爲虛名誤。循吏甘爲下下考。心勞撫字官聲著。
當時十友競榮宦。鴻飛冥冥弋何慕。至今樵牧尋舊迹。
尙有昌黎來往路。

次韻梅樹君師捷地壁間詩

恥向窗間老一經。風塵頓改舊儒生。詩人未學三年穀。
國士誰修萬里城。拔幟騷壇爭樹立。奪袍文陣又橫行。
梅花曾侍程門雪。鍊得冰霜傲骨撐。

原作

露宿風餐苦備經。此行差不負平生。談兵喜到盧龍
塞。乞食曾來五鹿城。山驛水程嘗酒送。霜橋月店詠
詩行。殘年恥作依人計。笑把清寒骨自撐。

過東光城

廢堞深濠樹兩行。朝曦初上到東光。城西門外匆匆過。

菩薩低眉笑我忙

桑園題壁

種種髣髴車裘日夜磨凍雲沈曠野寒日落荒河連
鎮人煙密桑園樹木多今宵入齊境濟水晚生波

夜過德州

獨車輾輾夜深行護送長途仗老兵好夢如雲隨雨散
舊愁似草苗泥生貧增家累宜爲客寒減詩才只好名
消受風塵何日了黎明又到德州城

紀莊過盧文肅相國師舊第

恍欲升堂拜靈輶不可尋文章知己淚鐵石古人心相

業山同重師恩海樣深劇憐廣陵散絕響歎嵇琴

四女寺

枯樹寒雅噪古祠河干駐馬夕陽時雲鬟霧髻諸神女
髣髴訛傳杜拾遺

恩縣道中

寒鷺隨雲遠殘陽向客低小山隨地凸短樹匝天齊峻
閣碑爲砌岑樓土作梯尙存兩書院

近聖
漳南

雁塔幾人題

在平道中

一車兩馬耐長征月店霜橋又幾程亂耳靡音聽不得
琵琶聲裏過在平

火色薦肩憶馬周功名未遂少年遊香醪濯足狂奴態
醉把侏儒付濁流

同城驛

指點同城驛匆匆策馬過雲中朝日圓樹外亂山多嵐
氣迎人爽晴光撲面和官橋今已圯擊楫渡鹽河

倉頡墓

鴻濛混沌事茫昧結繩而治多遺忘中古易之以書契
始制文字惟侯岡漆書鳥篆與科斗玉筋金薤森琳琅
豈料中壽墓木拱騎龍天上隨軒皇石槨瘞魄非藁葬
誰置翁仲立道旁芻靈作俑者誰氏輓歌蒿里聲悲涼

力牧執紼風后哭賜奠顓頊來高陽倉公或者乃其後
子孫祭掃拜明堂周之史籀秦李斯述古爭爲急就章
說文解字許祭酒亦能一一究凡將千秋絕學傳鄧氏
完白誰其繼者山陰楊蓮又有潘彤何子與孫甘辛名
棠老人老能把筆工三倉賤子學書苦未成隄廢不律非精良
今來古墓踞枯草妄希供奉一瓣香人生識字多憂患
幾回搔首呼穹蒼君不見讀書目不識丁字昨日入貲
今爲郎

紀事

昨日過杜平僕夫下車走少頃復登車云遇擔糞叟問

其年幾何甲子七十九問其歲豐歉顆粒均無有問其
官清廉蹙額屢搖首連年遭水旱飢饉徧畎畝縣官報
豐年反謂民逋負徵收必取盈荷校施械杻編氓無處
訴賢哉來太守太守謂縣官斯民似無咎汝其體恤之
循循須善誘縣官遽遷怒胥役遣某某下鄉索地丁反
以良爲莠小民閔然聚老穉攜男婦荷鋤復秉耜拋棄
升與斗堆置衙署前誓不事耕耦紛紛若聚訟縣官亦
束手余聞慨然歎太息吁嗟久唐代有周興斯人豈其
後入甕剩餘生死不如速朽驅車過署前觀者如堵牖
署門擘窠書曰民之父母可笑讀書人視民若雞狗寄

語諸君子勿爲民藉口

舊縣

磨鐵輪蹄夕照催僕夫
況瘁馬虺隤泉從白石縫中出
人向青山缺處來沙磧猶存前代血
斷崖尙挂古時苔
茫茫前路昏如漆何日方能起草萊

西楚霸王墓

百戰重瞳白骨埋楚歌四面憤王哀
至今草木餘王氣終古河山感霸才
騅馬營中悲叱撥美人帳下泣徘徊
傷心一片烏江水斷送英雄去不回

頓使千軍萬馬驚拔山蓋世竟無成
死眞瞑目看秦滅

生不甘心與漢爭。料得野雞能煽虐。笑他功狗盡遭烹。
風吹冰雪蕭蕭起。髣髴當年叱咤聲。

東平道中

歷盡崎嶇道東原。始抵平垓亭殘柝響驛路亂雞鳴。古
寺石爲壁荒村山作城。千秋梁灝里仰止舊聲名。

管仲三歸臺

穀城山色鬱岩巖。瞥眼青齊霸業銷。指點三歸臺畔路。
至今惟有東雲飄。

王彥章故宅

中原誰敵鬪雞兒。汴洛興亡一木支。善戰何愁雅作陣。

相見言金
一
夏
好名能使豹留皮千秋史筆書梁將夾寨奇勲破晉師
試問鐵槍今在否湯湯汶水繞荒祠

望嶽

一覽小天下巍巍仰岱宗青連齊魯郡翠矗漢秦松峻
嶺排千仞懸崖隔萬重問尋封禪處知在最高峰

滋陽道中

陂石橋頭路清泉帶雪涼朔風喧鳥雀落日散牛羊
鳬繹山皆秀龜蒙樹亦蒼離家一千里回首憶茫茫

宿南沙河驛

南北沙河路驚波落日黃斷橋人迹少古驛馬蹄忙
灤

灑清泉湧瑩瑩積雪涼下車投冷店夜夜夢匡牀

駱馬湖

一白連天地茫茫駱馬湖遠山圍作幃短樹寫成圖
水色比西子嵐光疑小姑詩人清徹底心迹似冰壺

湖上偶成

隔岼蒼山列畫屏清泉潄沸聚寒汀湖山有意迎人笑
草木無心送客青天外虹霓環曉日水邊雅點散零星
何人試鼓湘靈瑟風景依稀似洞庭

嶧山湖

夾堤亂石疊高坡車馬匆匆渡運河南向孤桐今在否

嶧山湖外樹陰多

韓莊題壁

傭保萍蹤聚相逢又別離車中尋舊夢壁上憶新詩落
照沈山疾浮雲入海遲晚來風乍起撲面凍生皮

山中夜行曲

夜半驅車行道左登山越嶺羸蹄跛何來寒士苦奔馳
車中傾側如顛簸風吹瘦骨冷於冰重裘坐擁猶疑裸
紙燈閃爍暗不明對面昏昏惟見我殘雪尙留古嶺松
凍雲又把高峰鎖峻嶒亂石叱如羊大如車蓋小如卵
初疑惡鬼森相向又疑怪獸皮毛褭麟麟磨折舊輪蹄

碾碎石棱迸烈火星斗光焰凍生芒朔風吹裂枯枝彈
安得曉日出扶桑五雲捧出羣花朵

宿大泉鹿氏家

歷盡嶧山路長途尙屬滕田家懸短榻杯酒話寒鐙雞

黍行人飽庭除月影澄曲肱聊作枕好夢遇詩朋

夢與寄泉

袖石
論詩

初入銅山界

霜華如雪滿晴郊樹截寒雲僅露梢忍凍何曾詩思減
吟哦短句自推敲

彭城懷古

鄭陂遙接呂梁洪。彭祖樓邊泗水東。幾見拔山觀戲馬。
何人擊筑聽歌風。雲生箕谷千重白。日照銅山一點紅。
若問當年關盼盼。空留燕子伴簾櫳。

望芒碭山

朝望芒碭山。上有天子氣。暮望芒碭山下。有英雄淚。英
雄在何許。亭長曰劉季。仗得三尺劍。赤帝斬白帝。王佐
有蕭曹。恥爲刀筆吏。可歎憤王勇。不敵淮陰智。重瞳轉
瞬亡。戰爭等兒戲。憶昔宴鴻門。項莊已屬意。撞斗笑范
增。徒爲遭物忌。呂雉比虞姬。恐難分位次。傷哉烏江水。
歌聲悲楚騎。長陵一坏土。漢兵亦垂涕。至今劉氏後。并

無尺寸地殊令廣武歎澄清誰攬轡茫茫大澤間山色
橫空翠

圯上張子房進履處

進履橋邊一少年藏弓烹狗見幾先赤松笑爾稱三傑
黃石曾遺手一編豈有美人爲宰相從無孺子學神仙
穀城山下來時路仲父相逢定惘然

睢甯道中

我來初經古邳州黃河隄畔暹陽浮當年爭戰割鴻溝
漢兵笑楚爲沐猴天意滅項興炎劉彭城霸業黯然收
東阿墳冢森松楸虞姬魂住城東樓拔山蓋世神仍留

一聲叱咤輕王侯。鯨彭樊魏非其儔。大敗漢卒太公囚。
戰將血染大刀頭。睢水不忍東南流。

夜行黃河堤

月落天光白。黃河萬里流水聲。喧餓虎。風勢吼奔牛。列
宿明中夜。羣山踞上游。勞勞車馬客。辛苦覓行舟。

曉過阜河

消受風霜苦。輪蹄熱鐵磨。青山蒙白草。紅日射黃河。短
髮便烏帽。長堤走白羸。衝寒吟不得。詩思晚來多。

客中長至感賦

年年佳節拜佳城。想到雙親淚暗傾。今日紙錢無處化。

斷魂何必到清明

昨宵葭琯動飛灰。冬至陽生煖意回。遙憶故鄉今夜月。
團圓兄弟共銜杯。

刺繡今朝一綫添。閨中寒甚閉重簾。山妻今日停鍼黹。
萬縷閒愁上指尖。

稚子喃喃學誦書。四齡解把亂雅塗。而今黃土埋桐櫬。
誰寫消寒九九圖。

清江浦口占

烏沙河岬水澄清。官吏拏船盡載兵。獨坐小車行得得。
御河亭畔看潮生。

淮安懷古

清江一櫂過淮關。舟自匆忙客自閒。湖到射陽波浩浩，
橋傾胯下水潺潺。廢垣頽壤枚臬宅，峭壁巒峻老子山。
試問劉伶臺畔路，竹林遙想醉時顏。

夜泊寶應

行盡山程又水程。扁舟一櫂過淮城。片帆風利不得泊，
白馬湖邊夜月明。

蕩舟湖中

未到高郵已見湖。沙灘處處長菰蒲。白連天地清如洗，
翠點河山澹欲無。小艇翩翩爭鯉鯉，亂帆拍拍混鷗鳬。

煙波萬頃舟千葉妙手難傳此畫圖

汜光湖上作

三十六湖水天光雲影浮山添殘雪積波挾亂冰流江海幾詞客生涯同釣舟孟城雙塔外回首看高郵

高郵阻風

挂帆瞬息到邗溝惱殺寒飈阻石尤萬縷炊煙銜舵尾千層雪浪打船頭射陽湖水明於鏡瓜步山光冷若秋依舊津門今夜月二分無賴照秦郵

隋山光寺

在揚州北嘉慶八年阮芸臺相國題額

隋代山光寺開皇第幾年沿堤千畝竹隔岸萬家煙螢

苑悲荒草雷塘賸墓田老僧今在否汲井問甘泉

廣陵懷古

蕭梁荷荷付東流文選昭明尙有樓草滿蕪城誰作賦
潮通瓜步自成洲露筋祠裏藏貞魄召伯湖邊歎舊游
二十四橋殘雪影空餘涼月照邗溝

九曲池頭奏管絃隋堤楊柳澹如煙狐鳴廢殿聲疑鬼
人到迷樓夢亦仙螢苑於今皆腐草雞臺終古傍甘泉
玉鉤斜畔埋香處誰向雷塘拜墓田

省識平山舊草堂瓊花一樹至今香從來孽子難爲帝
不信詞人亦號王水咽琴聲絕中散鵲啼血淚泣南唐

蜀岡高望新城壘立馬曾爲古戰場

扁舟南下悵離羣愁對揚州月二分幾處玉簫吹引鳳
有誰巫峽覓行雲鶯花過眼都成夢絲竹關心久不聞
俊侶重逢在何日可憐腸斷杜司勳

文峰寺

七級聳浮屠云是文峰寺高閣倚河濱光射斗牛氣

高明寺

亂竹圍孤塔寒凝舍利光紺宮嵌碧瓦白雪映紅牆門
繞三叉水碑畱四面坊登高東北望鐙火認維揚

夜泊破樹灣

梅莊詩鈔

卷七

三 東觀室

風湧寒濤急停橈破樹灣夾堤堆白雪隔浦看青山名
士多於鯽參軍竟作蠻今宵明月好辛苦照離顏

舟過儀徵

石尤風緊撲船頭揚子江邊動客愁岼雪未銷泥滑滑
一聲欸乃到眞州

泊殺馬洲

封姨阻我渡江行殺馬洲邊舫自橫隔岼青山殘雪積
沿堤翠竹暮煙平六朝舊恨人千古五夜新愁月半明
南望龍潭空豔羨西風吹送布帆輕

舟中對月獨酌

揚州風景好。跨鶴更腰纏。客路三千里。行裝十萬錢。晚霞紅映水。脩竹綠參天。獨酌無人共。邀來月滿船。

渡江作

波浪掀天萬里風。銅琶高唱大江東。山含積雪青成日。水射朝陽綠變紅。滾滾長流限南北。茫茫遺恨送英雄。六朝多少興亡事。風景於今迥不同。

江上望棲霞龍潭諸山積雪

銀海生花玉樹稠。漫天匝地雪光浮。詩人未老英雄志。笑殺青山已白頭。

黃天蕩懷古

盈盈天水蟄龍伏槎枒檜樹參天綠南風不競北風涼
五岳怒撼蚩尤觸女真崛起契丹亡鐵騎如山壓汴梁
五國城邊悲二聖渡江割據誤汪黃大家祇愛西湖好
單于跋扈誰招討蚊蠅曉市鬧成雷鄂王幽辱斬王惱
崢嶸妙計出釵裙不讓淮陰背水軍閭內元戎顏似玉
帳前猛將氣如雲兀術竊瞰長江口朦朧百萬隨波走
轟轟甲士聚雞籠蕭蕭戰馬鳴牛首橫江截路勢偏豪
閩國何心竟助梟桴鼓聲驚肝膽裂完顏部落望風逃
事後論功膺上賞梁夫人是千夫長湖橋驢背老英雄
鼇頭幸免漁人網我來江上欲瞻韓紅袖誰登大將壇

未得眼看秦氏滅至今嗚咽怒濤寒

過盧龍山下

煙水茫茫湧夕暉。渡江擊楫去如飛。盧龍山景濃於畫。
赤壁蒼巖白雪肥。

江船夜行

片席挂明月。隨風吹向西江船。孤客夢村店。五更雞雲
影連山遠。天光與樹齊。挑鐙拈短句。呵凍禿毫題。

泊燕子磯

燕子磯頭一小亭。插天石骨瘦瓏玲。雪經良夜中邊白。
松到嚴冬分外青。江水有聲流皓月。山峰倒影逼寒星。

觀音門外停舟處燈火人家亂似螢

抵金陵作

莫愁湖畔漲潮痕洗盡梅花旅客魂欲訪六朝金粉地
划船直到水西門

梅莊詩鈔卷七

男鼎元校字

梅莊詩鈔卷八

辛丑壬寅

白門集

天津

華長卿

枚宗

上雲巢舅氏六十韻

辛丑

業紹三公貴名齊八詠香始興高閎閎吏部煥文章

莊敏

公明季爲南京冢宰

奕奕生崧嶽觥觥作棟梁埋頭耽染翰總角

繼青箱讀史讎三豕趨庭憶五羊

外大父中憲公曾仕粵東

經綸傳

里閭孝弟冠膠庠益友推梅福

謂樹君師

難兄讓幼常椿庭

開廣廈萱草蔭高堂少賤追隨久

長卿七歲從受業

頻誇宅相

良然鬚增涕淚

先慈於嘉慶癸酉年棄養

摩頂暗悲傷講學循循誘

評文細細商樛材甘廢棄神驥早騰驤辛苦留衣鉢丁

年貢廟廊

丁丑入詞林

木天森茂豫藝苑重圭璋匏繫官如

寄喬齡鬢有霜

時中憲公春秋七十有五

萊衣春侍養衰經夜奔喪

讀禮難將母驅車別故鄉織簾功力粹負米道途長纔

下陳蕃榻

設帳偉堂先生家隨山右學使幕

旋催季子裝高才搜魏晉

古蹟訪陶唐上艾皋比擁

主講平定書院

詞壇廩祿償

壬午留館授職

編修瑯嬛披簡冊桃李盛門牆

從學登甲乙科者數十人

分校羅燕冀

呈材渡岳湘

戊子典試湖南己丑分校禮闈提調國史館

冰壺勤照澈玉尺

妙裁量文苑傳家學循聲蔚

國光雲間來召杜吳下有龔黃

辛卯放松江太海嶠看守甲午調蘇州

驅鯉

在上海稽查洋艘

江村說捕蝗

著有捕蝗備要

泖河通水利

修河工竣

欽加道銜拔取方正學裔 邵雨徧金閭獎勵忠臣裔栽培弟子行

孫及孫文披星聽獄訟戴月勸農桑淚灑歐公荻甲午七月

定公曾孫丁太淑人憂 甘留召伯棠板輿三載奉靈輶一舟杭窀穸謀

住宅圖書作宦囊校詩開丙舍刻石表瀧岡塋葬後校刻欣遇齋

詩集并年譜及問石山房墨迹 祖德醇風厚

君恩湛露灑冰銜仍典郡丙申服闋卽放江甯太守晉階觀察 膏澤舊分

疆借寇民心愜瞻韓喜欲狂金陵隨雨化玉節順風颺

用濟需舟楫持籌重稻梁轉輸分十郡賑卹發千倉舊

弊驅除盡新猷審慎詳丁胥勤畛恤兵弁靖譴張妙手

籌災歉關情問雨陽口碑鐫整肅心簡契明敷書許兒

孫讀謀詒奕葉昌
身前參佛果肘後著仙方
愧我傷弓鳥渾如失道
俚家無田負郭戶少甕
儲糧耕硯猶存舌
搜詩尙有腸怯登紅杏
路笑對紫薇郎拋棄青
瑣去來依絳帳旁海氛
人北顧關雪雁南翔
招入蓮華幕重縫薜荔
裳論文徵學識把酒話
行藏時雨花都潤春風
座不涼詩歌追短李賦
筆擬長楊躋躋功名老
蹉跎歲月忙名場勞逐
逐宦海看茫茫酷似何
無忌吟成送渭陽願書
千萬本留表大功坊

金陵懷古

辛丑仲冬初來白下游
覽山水裴回陵闕雖陳

迹都非而流風尙存慨自繁華六代銷歇千秋
至於南唐之割據南宋之駐蹕瞬息雲散而朱
明之興亡尤令人感悼爰得七律十章以寄憑
弔之意云

蔥龍王氣秣陵秋虎踞龍蟠繞石頭兩代雄才窺楚越
三分霸業敵曹劉談兵誰及周公瑾生子當如孫仲謀
腸斷橫江沈鐵鎖悔占青蓋洛陽游

渡江五馬一龍奔淚灑新亭最斷魂九曲煙波王導宅
半山絲竹謝公墩燕飛不入烏衣巷鳳去難尋朱雀門
聽罷桓伊三弄笛畫船燈火問桃根

萬金一擲笑撈菰。擣藥聲聲喚寄奴。帝子有靈仍射雉。
王孫無罪竟屠豬。樂游苑裏詩人杳。元武湖邊戰士孤。
盜狗歸來看斂版。湘宮煙雨泣蒼梧。

景陽樓上晚鐘沈。宮女爭穿乞巧鍼。趙鬼挪揄工讀賦。
仲雄懊惱更彈琴。酒邊楊柳枝枝翠。地下蓮花步步金。
閱武堂前春夢短。空留家令自孤吟。

蕭郎頗有帝王才。老見東堂戰壘開。三度捨身同泰寺。
半生說偈雨花臺。甘心佞佛昇天去。苦口呼人索蜜來。
千古滔滔淮堰水。至今波浪有餘哀。

臨平湖水漲泥沙。日照臺城黯澹斜。三閣詞章邀狎客。

四更歌舞醉官家。心肝斃喪推江總。粉黛銷磨賸麗華。
井底胭脂流不盡。問誰重唱後庭花。

澄心堂紙色爛斑。畫出秦淮水一灣。蠶日填詞誇五鬼。
霓裳譜曲豔雙鬟。漫教鼓楫浮梁外。肯許酣眠臥榻間。
憶否鴛鴦新寺主。不知何處念家山。

依舊勞勞送客亭。無端忽作小朝廷。岳山埋地冤誰白。
檜樹參天色更青。暫假西湖支壞壁。竟教南渡等浮萍。
江流浩浩黃天蕩。鼙鼓聲中戰血腥。

一聲鳴鳳亂雲飄。整頓江山勝六朝。劫火光中飛燕子。
金川門外集鴟鴞。湖邊缺月人何在。石上忠魂血未銷。

十族抄來瓜作蔓孝陵松柏莽蕭蕭
宮闕傾積蔓草荒莫愁湖水綠茫茫
孱王有意爲陳主
驚馬無知問阮郎開府干戈同演劇
隔江燈火笑移防
可憐一曲薰風殿不及桃花豔李香

雨花臺側謁方公景公二祠

獨上木末亭寒江如一綫涼風吹客衣
天際孤鴻健下岡拜古祠遺像皆碩彥
正學善讀書教授志不賤血淚洒麻衣
哭聲震宮殿日月照丹心投筆誅其篡
嶽嶽景御史老謀有深算緋衣懷白刃
惜未酬所願傷哉殲十族毒矣抄瓜蔓
忠魂偕卞壺烈魄追袁粲乾坤有宿儒

至死皆不變地下見高皇痛訴元黃戰我今拜座前敬
熱香一瓣墓讀碑碣字媿乏蘋蘩薦北望金川門啄肉
飛來燕笑殺李九江論功誇靖難

桃葉渡

洞口桃花別有村空餘桃葉與桃根劇憐一片青溪水
詞客初來已斷魂

登報恩寺塔

一覽金陵矮人煙聚石頭凍雲連野色寒日帶江流烏
鵲空中沒樓臺望裏收四圍山萬壘顧盼幾時游

聽雨憶筠莊

鐙殘香燼漏聲催。紙帳梅花夢裏開。
依舊連牀聽夜雨。不知鴻雁幾時來。
望家書不至

秦淮水榭

萬古秦淮水。經冬亦不寒。
何人吹玉笛。有客正憑欄。
畫舫波聲急。高樓日影殘。
釣魚尋舊巷。無處問丁官。

題馬石樵茂才

堯年

藤花館詩草

一編吟藁足傳神。如見欽崎磊落身。
何日扁舟渡江去。紫藤花下訪詩人。

贈張斂庵同年

元福

歸江浦

渡江深悔識君遲。纔得相逢又別離。
驛路梅花千萬樹。

東風吹放向南枝

二十二日有感

重泉歎我竟無成
夢裏猶聞喚子聲
西北關山翹首望
白雲深處是佳城

背菱護花祀竈前
含悲風木已多年
關心廿載今爲客
腸斷江南臘月天

冬夜偶成

殘柝脆于板
頻催五夜忙
惡梟啼壞木
饑鼠齧空箱
室靜心都死
衾孤夢亦涼
腹枵嘔血盡
猶自索枯腸

除夕憶家

梅莊詩鈔

卷八

六 東觀室

想到家山淚滿巾
桃符又換墨華新
叩門定有催租客
入座頻添索債人
合眼難尋今夜夢
傷心卻憶去年春
聲聲爆竹喧通夕
祇飲醇醪不送神

早春偕友人游隨園瞻簡齋先生遺像得七律四

章。壬寅

小倉山占六朝春
濃翠全銷九陌塵
翰墨因緣來弔客

是日同人吟車秋船先生

琉璃世界拜詩人
千竿綠竹能醫俗
萬樹

梅花替寫眞
我到名園倍惆悵
月明如現宰官身

奇才久已萬人傳
恨我遲生四十年
未得春風隨杖履

空來福地訪林泉
相公許作眞名士

謂尹文端公

兒女爭呼

老謫仙最是煙雲如意好

錫山吳省曾爲先生繪煙雲如意圖

吟魂常在

蔚藍天

樓臺屈曲九迴廊繞到先生舊草堂
四季名花開錦繡雙湖新水渙文章
飛來香雪都成海引得青雲不隔牆
波皺粼粼邀塔影芙蓉猶未長池塘

山斗聲靈海鶴姿渡江人物數袁絲
飽酣經史休官早老戀鶯花得子遲
黃土一坏埋傲骨

先生墓在園中西南隅

青箱

三世

先生子蘭村明府孫又村上舍曾孫茂才銑銘二人

守荒祠

祠堂爲孫淵應如觀察篆額

知絕代風騷主不僅流傳萬首詩

游鷺峰寺

初到驚峰寺嚴城睥睨斜澹雲江總宅殘照段侯家古
渡迷桃葉荒園冷菜花老僧知愛客汲井焙新茶

憶內

臥聞海燕話深檐驀地情絲萬縷添漂絮問誰操井臼
頽羹何處覓齏鹽屢驚好夢來心上莫織回紋驗指尖
穉子誦誦須畫荻紅鐙影裏隔重簾

花朝登樓對月有懷

水邊春色二分加詞客憑欄感歲華明月有情偏照我
孤衾無夢不還家醉拈彩筆休題鳳喜熱名香默禱花
今夜團圓千里共玉人何處弄琵琶

上元署中作

客裏重爲客。空庭夜不寒。雨昏鐙影溼。風急雁聲乾。支
枕吟詩澀。移牀入夢難。寥寥衙鼓換。聽到五更殘。

雜詩

翠竹森森夕照紅。白門柳色尙葱蘢。當年佳話誰能記
廳事階前長瑞菰。

黜陟全憑筆一枝。好懸明鏡別妍媸。鐙光人影三更後
二十年前應考時。

卯角神童十二齡。

李鎮

拈毫默寫十三經。春秋背誦如翻

水。環堵諸生側耳聽。

亭心輒縫草痕齊姑惡聲聲向客啼東閣有詩吟不得
怕風吹過短牆西

二月二十五日作

笑我頻年受墨磨鮎魚上竹鵲填河童場再入眞如夢
宦海旁觀尙有波滿院蒼苔人迹少隔窗綠竹雨聲多
閒廳賸得襦褌影紙帳寒鐙喚奈何

清明有感

一片鄉心埽不開紙錢飛上雨花臺遙知姜井汪莊路
少箇兒孫下拜來

朝天宮西謁卞忠貞公墓

冶城挂殘照綠淨松楸影尋逕踏蒼苔叩門聞鶴警言
訪卞公墓悚然肅仰景典午南渡後朝廷勢可憫將軍
多跋扈來若飄風隼王導涕沾襟毋乃奇才窘庾亮召
寇至種蒔尤愚蠢卓哉尙書令慷慨義氣猛都督大桁
東血戰能馳騁殺身以報國亮節振臺省膝下有佳兒
厥名盱與眈父忠子死孝俊骨埋童髻握爪屈如鐵幽
魄殊勁挺忠孝萃一門史策光彪炳至今二千載生氣
猶凜凜再拜石碣旁宿草茵鋪錦高山多白雲英靈聚
山頂石城袁司徒招魂酒共飲

東花園晚眺

鷺峰寺裏磬聲圓近郭人家釀晚煙淮水綠于芳草地
菜花黃到夕陽天雉垣似鋸山斜錯雁塔如錐穎倒懸
舊迹欲尋江令宅空餘垂柳畫橋邊

三月十一日邢園觀牡丹

邢園春色滿樓臺傾國傾城頃刻開埽逕喜邀名士賞
倚闌如見美人來松棚篩透朦朧日竹檻低遮淺澹苔
彈指韶光容易過一年一度爲誰栽

貴彩濃姿壓眾芳嘉名應號百花王胭脂買得春無價
羯鼓催來睡亦香檀板金樽歌豔曲銀盤玉合闕新妝
南朝別有傷心處風景依稀似洛陽

臨芳殿裏雪夫人絕代銷魂數太眞三月繁華原是夢
半生富貴不知貧姚黃魏紫花都活歐碧鞋紅色更勻
記否染衣酣酒處沈香亭北問前身

賃春亭畔桂堂東老圃新開地數弓國色潤沾鳩婦雨
天香濃惹鼠姑風奢心巧製千堆錦妙手痕留一捻紅
栩栩成團黃蛺蝶問渠何事入花叢

贈友人

宣武坊西憶舊游那期同泛秣陵舟春隨柳色匆匆去
難綰離人萬種愁

好風吹客到蘇臺虎阜游人載酒來草滿滄浪亭畔路

鱖魚初上杜鵑開

石觀音道院訪周處讀書臺故址

陽羨山中有周處辭別江東事典午沒水手斬長橋蛟
彎弓又射南山虎折節讀書工屬文師事陸機同陸雲
罷政曾除楚內史論功復拜前將軍將軍破陣爭鏖戰
橫腰膺有龍泉劍可恨梁王與夏侯忍教烈魄忠魂斷
英雄膽裂憤填胸叱咤頭顱血染紅一死未酬忠孝志
幸留將種補奇功憶昔少壯同無賴故鄉父老憂三害
厲節改行真異人孝侯品詣殊神怪我今初過蟒蛇倉
署公遺像神飛揚石觀音洞爭羅拜臺畔無人奉瓣香

傳聞滬瀆烽煙繞談兵紙上書生老願借將軍死後靈
夷氛百丈看橫埽飲虹橋廢城南隅赤石磯邊問舊居
一片清聲起竹末夜深髣髴讀兵書

贈馬鶴船

壽齡

廣文

七載春明別交深一面緣養親娛白髮講學守青瑣屢
訪情偏切重逢喜欲顛頓驚鬚鬢改不似舊鳶肩

詩興隨春去招尋識草廬雲山名士老風雨故人疏笑
我空拈筆知君早著書一般詞賦手合作馬相如

倦矣飛歸鶴相知尙有丁

時館於
丁氏

青袍增感涕絳帳更

窮經卜易搜義畫聞詩紹鯉庭

文郎鶴子年十
三律詩頗工

芭菜佳

弟子

謂高足龔李二生

能辨豹文駝

風流懷謝傅
質廡傍溪橋
老圃花三徑
垂楊路一條
冶城微雨霽
鍾阜澹雲飄
莫負看山約
尋君話六朝

東望

鳳皇飛去後
寂寞杏花村
春色歸滄海
詩人老白門
看山頻送客
對月強開樽
東望烽煙急
將軍細柳屯

早起偶成

天教來看六朝山
半日尋春半日閒
酒對名花邀月飲
詩同亂草倩人刪
良朋久別都疑鬼
獨客無眠竟類鰥
車笠交情鴻案樂
故鄉夜夜夢中還

夜坐

簾鉤斜月半昏黃。醉後迷離倚枕傍。有夢忽驚春色短。
無人偏覺晚風涼。鑪銷殘篆香彌靜。詩得閒心味轉長。
坐到紙窗燈影暗。竹聲如雨夜蒼蒼。

莫愁湖

望湖樓傍勝棋樓。兒女英雄土一邱。縱使莫愁今尚在。
茫茫煙水亦生愁。

不解言愁強笑頻。蛾眉賸得畫中身。六朝天子匆匆去。
二水三山屬美人。

漫說婁湖更蔣湖。城西依舊綠平鋪。太平門外波千頃。

白藕紅蓮問小姑

彈指華嚴弔夕陽詩人重到鬱金堂天津橋北盧妃巷
爭及青樓姓字香

檢點行篋得友人贈答詩寄懷高寄泉

短髮飄蕭不滿梳撚髭吟興近何如詩名竟欲追高適

宅相真能學魏舒

君長于外家爲王
古愚先生器重

風雨雞鳴君子夢

雪泥鴻爪故人書衙齋寂寞空相憶誰向樂城問草廬

五月

五月江南景陰晴日幾回曙光蒸紫菌雨氣釀黃梅螢
閃星星火蚊轟殷殷雷不知身是客歲月暗中催

不寐

不寐翻嫌夏夜長空齋聽雨倍淒涼名心未死捫猶熱
鄉夢雖眞醒漸忘帳外飢蚊愁覓食壁閒黠鼠任跳梁
枕函誰置閒花朵臥到殘更尙有香

海濱

海濱烽火耀天明羽檄交馳萬馬驚滬瀆孤城難拒守
吳淞巨舶任橫行竟如倭寇乘風至誰把妖氛一掃平
竝聽將軍復和議書生紙上漫談兵

聞道

聞道狼山外樓船日夜過海門烽火疾江岬陣雲多巨

室悲遷徙將軍喚奈何全憑東粵賈談笑卻兵戈

明瑟軒偶成

炎風薰熱到冰衙贏得虛名縮似蝸設饌新登諸葛菜
分畦閒種邵平瓜樓窺塔影山遙拱樹界溪光日易斜
明瑟軒中銷夏好水晶盤子薦枇杷

誰獻

誰獻平戎策新亡曲逆侯火攻難對壘水戰在沈舟白
鬼揶揄笑蒼生黯黹愁一灣鵝鼻背見月喘吳牛

風送

風送樓船趁怒潮圖山西望過金焦空橫鐵鎖三江險

竟壞長城萬里遙。下邑牛羊迎賊獻。上軍貔虎任人燒。
可憐北固樓頭月。光焰沖天火未銷。

負屍行

鐵甕城頭鳴戰鼓。將軍畏敵如畏虎。刀劍光中血肉飛。
殺人夾巷屍如堵。森嚴宿衛錦衣行。不捉奸人捉漢兵。
枵腹貧儒愁餓死。居奇富賈慘遭刑。閉城七日羞言戰。
千戶萬戶哭聲亂。黑鬼綠堞白鬼來喪心。太守先逃竄。
紛紛蟻聚復蜂屯。十萬頭顱帶血捫。烈女殤童爭自縊。
幽魂解報

帝王恩死屍堆累。山邱積縱橫。阻隔行人迹。買得蚩氓

負出城兵錢七十民二百前面負者屍無首後面負者
屍如狗濺血淋漓污滿腰監門叱咤鞭之走一人負屍
向南去一人負屍從北來亂鴉飛逐啄其骸死人含笑
生人哀從今休說丹徒好黃沙碧血無青草丁卯橋邊
惡鬼多藏春塢口行人少今日江濱屍如舟明日江濱
水不流夜深燐火作鬼語閻羅命我姑蘇游

感事

金焦山下寇橫行江岼何曾駐守兵北固礮雷轟地震
南徐烽火耀天明票鹽流毒民成賊餓莩盈溝血有聲
夜半新豐軍又潰倉皇殺贖綠旗營

火輪船到古真州驚得維揚滿郭愁
巨室先逃販鹽賈
大江爭堵運糧舟
潮添六尺東風疾
月黯三分列宿憂
河伯宣防資保障
麒麟到底勝黃牛

舳艫袞袞渡江來
日射山城四面開
撤盡雄兵羞對壘
逃存上將又登臺
漫誇虎踞龍蟠勢
只聽風聲鶴唳哀
賴有慈悲和事老
安危全仗濟時才

妖氛燄灼入江深
刁斗無聲夜氣沈
盪寇不遵

天子詔養癰誰識老臣心
齋梁飽餽三千石
贖地先輸
百萬金城下干戈
何日退將軍
惟有淚沾襟

七月二十一日紀事

古城隍廟看新鬼陰風慘澹日如水平旁阿難競馳逐
夜叉亦愛金陵美漢兵小隊耀前騶旌旗五色黯然愁
銀刀似雪來銅狄鐵騎如雲擁石頭偏裨譯使並轡走
前有方伯後太守酋長兇頑類虎狼蠻奴骯髒同豬狗
凹顗隆準毛髻鬚目光深碧搖圓睛反脣裂齒笑如哭
向人時作飄飄鳴白帽覆頂似掀簸洋絨赤黑周身裹
上下不分衣與裳束縛支體形疑裸左手執礮右持刀
火槍火箭森橫腰據鞍駿馬高六尺馬蹄亂趁秋風驕
別有島民骨肉墨頓教鎖鐵無顏色漆骸健隨馬後奔
回眸屢顧真奇賊喧傳城市鬼初來棘院無端變夜臺

建業瑜伽施燄口皖江冤魄考遺才老酋盤踞居中坐
我

朝將相左右个當路豺狼食肉飛處堂燕雀爭相賀花
田五畝金萬千功成和議圖淩煙早知今日盟城下悔
不當時力守邊憶昔嘉慶歲丙子越裳獻雉求通市

卻貢

嚴威懾百蠻西戎底敘

天顏喜我年十二居故鄉道旁曾看新氏羌前列鹵簿
奏笳鼓狀頭面貌白于霜氣象柔服意恭順我兵耀武
誇雄陣沾上何人撤水師粵東從此開邊釁劫灰定海

興甯波廈門香港烽煙過乍浦寶山及上海可憐京口
哭聲多舳艫橫截長江而將軍膽裂空言戰不據維揚
據秣陵六朝風景煙雲變賴有人奴今衛青能抒奇計
佐阿衡黃金鋪地人拋甲白日當天鬼入城君不見拂
鬚參政癭宰相貴人能具鬼情狀更有南唐大小馮魑
魅魍魎千般樣吁嗟乎閻羅鐵面來幽冥懸鏡照膽秦
王庭莫令鬼子揶揄笑照得衣冠盡變形

曉起口占

晨色動窗牖羅幃生薄寒荒雞啼月墮乳燕惜花殘知
足心常樂無求夢亦安幾時游華嶽高臥學陳搏

報恩寺題壁

東望南徐烈燄紅漢家貔虎變沙蟲
陽侯忍斷江心鎖箕伯橫吹海面風
幾處將軍誰破虜從來宰相喜和戎
冶城多少金銀氣都付煙銷火滅中

鐵艦如飛擁白門驚濤駭浪走孫恩
乘軒倦鶴愁將戰當道貪狼怒欲吞
受命犒師來柳下移家避世入桃源
依然城郭人民去王謝堂前燕子喧

封豕長蛇勢怒蟠漢兵爭學沐猴冠
妖氛壓陣軍如墨殺氣憑城夏亦寒
弟子輿尸誰任咎小兒破賊盡知難
八公山下需霖雨百萬蒼生望謝安

梅莊詩鈔

卷八

宅 東觀室

不聞刁斗角弓鳴細柳深藏大將營上策攻心堪報

國下民奮志竟成城憂危幸免紅羊劫談笑重尋白馬
盟雨洗甲兵銷蜃氣銀河秋色靖機槍

傳說閼氏是休屠中原誰遣築瓊廬金甌寰海撐銅柱
鐵券盟山鑄玉書天意竟容魑魅去人心慣與虎狼居
西江黃雀高飛盡煙火頻殃涸轍魚

誰許山魃汗漫游桂花香冷寺門秋貞魂有恨冤埋骨
古佛無靈冀著頭鈴語搖風朝上塔刀光磨月夜登樓
江天一紙揮鵝管權把金陵筆底收

蔣帝山邊集惡梟小姑祠畔哭聲嬌浮家競覓三年艾

歸艇重驚半夜潮。兵氣蒼涼秋瑟瑟。人煙寥落水迢迢。
六朝金粉飄零盡。不忍重過舊板橋。

太白樓頭濁酒斟。醉中何處覓知音。山川奇氣通蠻語。
江海秋聲動越吟。患難肝腸經百鍊。亂離書信抵千金。
干戈叢裏詩人老。收斂才華賦上林。

中秋月下偶成

依舊故鄉月。江南分外明。全銷蒼莽色。遠照別離情。
我欲乘風去。重歌醉月行。今宵倍惆悵。子影坐殘更。

枕上偶成

枕簟涼如水。西風透茜紗。愁看樓上月。飽嗅帳中花。
活

木月言金
二
月
三
潑吟情動曹騰睡味加竟忘身是客夜夜夢還家

二十五日作

江南詞客正思家醉上高樓看月華小別嫦娥剛十日
被風吹影到天涯

羅浮老圃是前身摧折花枝墮劫塵三十八年彈指過
古梅樹下一詩人

梅莊詩鈔卷八

男復光校字